

# Da lunsch davent – Rumantschs a l’ester

■ (cp) La Rumantschia è pitschna – Rumantschas e Rumantschs datti dentant bunamain dapertut sin il mund. Tenor il Departament federal d’affars exterius vivan circa 750 000 Svizras e Svizzers a l’ester. Quants che discuran rumantsch e nua ch’els vivan n’è betg enconuschent. Perquai sa metta Radiotevisiun Svizra Rumantscha a la tschertga da las Rumantschas e dals Rumantschs a l’ester cun la finamira da raquintar lur istorgias. Venderdi, ils 20 da favrer 2015 entschaiva la tschertga.

Cuschinar per ina da las megras equipas da hockey dal mund a Vancouver, far musica rumantscha a Mexico, ina citad cun passa otg milliuns abitants u esser bunamain mintga di sut l’aua en las Filipinas per instruir ils turists da sfunsar. Quai èn mo trais istorgias da Rumantschas e Rumantschs che vivan a l’ester. Blers èn ids en l’exteriur per studegiar, emprender ina nova lingua u per far in viadi. Savens era l’idea da puspè turnar, mo alura è insatge vegnì tranteren: Savens l’amur, magari era in nov job.

## Annunziar e gudagnar 1000 francs

Per chattar uschè bleras Rumantschas e Rumantschs a l’ester sco pussaivel, lantscha RTR in di d’acziun venderdi, ils 20 da favrer 2015. Durant l’entir di han tuts la chaschun d’annunziar persunas che vivan a l’ester. Quai cun telefonar direct en il studio, u cun scriver in mail sin l’adressa [davent@rtr.ch](mailto:davent@rtr.ch). Tgi che annunzia sazez



Rumantschas e Rumantschs datti bunamain dapertut sin il mund. MAD

u insatgi auter ha la schanza da gudagnar in bon dad ir en vacanzas en la valur da 1000 francs. Quest bon è vegnì sponsorà dals biros da viadi Capricorn ed Engelreisen. Ina charta dal mund sin [rtr.ch](http://rtr.ch) è il fil cotschen dal project. Là vegnan las datas publicgadas cun il consentiment da las persunas. La tschertga da las Rumantschas e dals Rumantschs cuzza fin la fin d’avrigl.

## Nova metoda da quintar istorgias

En in proxim pass fa RTR in pign casting per pudair realisar las contribuziuns al ra-

dio, televisiun ed online. Cun circa 15 persunas faschain nus intervistas al telefon ed emettain ellas en il radio. Trais persunas main nus a visitar e faschain in purtret che vegn emess en il Telesguard. Radiotevisiun Svizra Rumantscha emetta tut questas contribuziuns durant in’emna tematica l’entschatta november 2015. Part dal project è er ina pagina multimediale cun bleras fotografias e films curts. Questa moda e maniera da raquintar istorgias cun maletg, tun e text è daventada pli e pli populara ils ultims onns.

## In project pratic enstagl da mo teoria

Jau realisesch quest project en il rom da mia scolaziun «MAS Multimedia Communication» a la HTW a Cuira. Per la lavur da diplom hai jau elegì il tema «Crossmedia Storytelling tar RTR». Quai vul dir: Co raquintan ins ina istorgia sin tut ils chanals, pia radio, televisiun ed online? Enstagl da scriver ina lavur scientifica da passa 60 paginas hai jau decidi da sminuir la part teoretica e persunter realisar in project pratic.

Ulteriuras informaziuns:  
Paula Nay 076 394 16 00 [paula.nay@rtr.ch](mailto:paula.nay@rtr.ch)